



Bosna i Hercegovina
Federacija Bosne i Hercegovine
Tuzlanski kanton
GRAD GRADAČAC

H.K. Gradaševića 54, 76 250 Gradac, telefon 035-369-750, fax. 035-369-751, e.mail: opc.grad@bih.net.ba, www.gradacac.ba

Prijedlog

Na osnovu člana 8. stav 3. alineja 9. i člana 13. stav 2. alineja 5. Zakona o principima lokalne samouprave ("Službene novine Federacije Bosne i Hercegovine", broj 49/06 i 51/09), člana 184. Zakona o zaštiti i spašavanju ljudi i materijalnih dobara od prirodnih drugih nesreća ("Službene novine Federacije Bosne i Hercegovine", broj 39/03, 22/06 i 43/10), i člana 6. stav 1. tačka 7. Statutarne odluke o organizaciji Grada Gradac u skladu sa Zakonom o Gradu Gradac („Službeni glasnik Grada Gradac“, broj 1/19 od 11.06.2019.godine) a u vezi sa Odlukom o proglašenju stanja nesreće uzrokovane pojavom koronavirusa (COVID -19) na području Grada Gradac (br. 02-04-683/20 od 18.03.2020. godine), Gradsko vijeće Grada Gradac, na sjednici održanoj dana -04.2020. godine, **donosi**

ODLUKU

o privremenom oslobađanju od obaveze plaćanja naknade za zauzimanje javnih površina, naknade za neizgrađeno građevinsko zemljište radi korištenja postojećih objekata privremenog karaktera i naknade za korištenje taksi stajališta na području Grada Gradac

Član 1.

Ovom Odlukom utvrđuje se semjera privremenog oslobađanja od obaveze plaćanja naknade za zauzimanje javnih površina kao i obaveze plaćanja zakupnine za neizgrađeno građevinsko zemljište radi korištenja postojećih objekata privremenog karaktera kao i obaveze plaćanja naknade za korištenje taksi stajališta na području Grada Gradac, u cilju pomoći fizičkim i pravnim licima, i drugim pravnim subjektima, u smislu sanacije ekonomskih posljedica nastalih epidemijom koronavirusa (COVID-19).

Član 2.

Pojmovi upotrijebljeni u ovoj Odluci imaju sljedeće značenje:

- a) Pod korisnicima **javnih površina** podrazumijevaju se fizička i pravna lica, kao i drugi pravni subjekti, kojima je odlukom Grada Gradac i/ili rješenjem gradske službe za upravu nadležne za komunalne poslove, utvrđena obaveza plaćanja naknade za zauzimanje javnih površina, odnosno izvođenje radova i postavljanje bilo kakvih sadržaja, predmeta, objekata i uređaja na određenoj k.č. za potrebe sportsko-rekreacionog sadržaja na javnim površinama, za koje je odlukama Grada Gradac kojim se uređuje komunalni red, propisana obaveza pribavljanja odgovarajućeg odobrenja i obaveza plaćanja naknade,
- b) Pod korisnicima **taksi stajališta** podrazumijevaju se fizička i pravna lica kojima je odlukom Grada Gradac i/ili rješenjem gradske službe za upravu nadležne za komunalne poslove, utvrđena obaveza plaćanja naknade za zauzimanje javnih površina u svrhu korištenja taksi stajališta,
- c) Korisnici **neizgrađenog građevinskog zemljišta**, podrazumijevaju se fizička i pravna lica, kao i drugi pravni subjekti, kojima je odlukom Grada Gradac i /ili ugovorom gradske službe za upravu nadležne za komunalne poslove, utvrđena obaveza plaćanja zakupnine za neizgrađeno građevinsko zemljište radi korištenja postojećih objekata privremenog karaktera na području Grada Gradac.

Član 3.

Korisnici **javnih površina i neizgrađenog gradskog građevinskog zemljišta**, kojima je naredbom Federalnog štaba civilne zaštite (u daljem tekstu: Naredba) zabranjeno obavljanje djelatnosti oslobađaju se obaveze plaćanja naknade i zakupa, utvrđene odlukom Grada Gradac kojom se uređuje komunalni red, i to za period počev od stupanja na snagu Naredbe, odnosno od 18.03.2020. godine, do isteka roka od 60 (šezdeset) dana od dana ukidanja zabrane obavljanja djelatnosti.

Član 4.

Korisnici **taksi stajališta** oslobađaju se obaveze plaćanja naknade utvrđene odlukom Grada Gradac, kojom se uređuje pitanje naknade za korištenje taksi stajališta, i to za period počev od dana stupanja na snagu

Naredbe Federalnog štaba civilne zaštite, broj 12-40-6-148-40/20, od 22.03.2020. godine, odnosno od 22.03.2020. godine, sve do stupanja na snagu odluke kojom se van snage stavlja Odluka o proglašenju stanja nesreće uzrokovane pojavom koronavirusa (COVID-19) na području Grada Gradačac, broj:02-04-683/20, od 18.03.2020. godine.

Član 5.

Za provođenje ove odluke zadužuje se gradska služba za upravu nadležna za komunalne poslove, koja će mjere utvrđene ovom Odlukom realizirati po zahtjevu stranke ili po službenoj dužnosti.

Član 7.

Odluka stupa na snagu danom objave u „Službenom glasniku Grada Gradačac“.

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD GRADAČAC
-Gradsko Vijeće-**

Broj:
Datum:

Husein Kujraković, prof.

PREDSJEDAVAJUĆI
GRADSKOG VIJEĆA

O b r a z l o ž e n j e

Pravni osnov za donošenje ove Odluke sadržan je u odredbi člana 8. stav 3. alineja 9. Zakona o principima lokalne samouprave ("Službene novine Federacije Bosne i Hercegovine", broj 49/06 i 51/09) kojom je propisano da u vlastite nadležnosti jedinice lokalne samouprave posebno spada i utvrđivanje politike upravljanja i raspolaganja imovinom jedinice lokalne samouprave, kao i odredbi člana 13. stav 2. alineja 5. navedenog Zakona kojim je propisana nadležnost gradskog vijeća da donosi odluke o upravljanju i raspolaganju imovinom jedinice lokalne samouprave.

Članom 184. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03, 22/06 i 43/10) propisano je da grad finansira saniranje dijela šteta nastalih prirodnom i drugom nesrećom, u skladu sa svojim materijalnim mogućnostima.

Članom 6. Statutarne odluke o organizaciji Grada Gradačac u skladu sa Zakonom o Gradu Gradačac („Službeni glasnik Grada Gradačac“, broj 1/19 od 11.06.2019.godine), utvrđena je nadležnost Gradskog vijeća za donošenje odluka o upravljanju i raspolaganju imovinom Grada.

Kada su u pitanju razlozi za donošenje ove Odluke bitno je navesti kako slijedi. Naime, Odlukom Vijeća ministara Bosne i Hercegovine o proglašenju nastanka stanja prirodne ili druge nesreće na teritoriji Bosne i Hercegovine ("Službeni glasnik Bosne i Hercegovine", broj 18/20), proglašava se nastanak stanja prirodne ili druge nesreće na području Bosne i Hercegovine zbog opasnosti od moguće pojave epidemije zarazne bolesti prouzrokovane novim koronavirusom (COVID-19), a kako bi se smanjio rizik od ubrzanog širenja infekcije. Dalje, Odlukom Vlade Federacije Bosne i Hercegovine o proglašenju nesreće uzrokovane pojavom koronavirusa ("Službene novine Federacije Bosne i Hercegovine", broj 21/20), kao i Odlukom Vlade Tuzlanskog kantona o proglašenju stanja nesreće uzrokovane pojavom koronavirusa, od 17.03.2020. godine, proglašava se stanje nesreće uzrokovano pojavom koronavirusa (COVID - 19). Također, Odlukom Vlade Tuzlanskog kantona u vezi sa proglašenjem stanja nesreće uzrokovane pojavom koronavirusa (COVID-19) na području Federacije Bosne i Hercegovine i opasnosti od širenja zarazne bolesti na području Tuzlanskog kantona, broj 02/1-40-6226/20 od 17.03.2020. godine utvrđuju se obaveze i zaduženja u cilju zaštite i spašavanja ljudi i materijalnih dobara na području Tuzlanskog kantona.

Kada je u pitanju područje grada Gradačac, Odlukom o proglašenju stanja nesreće uzrokovane pojavom koronavirusa (COVID -19) na području Grada Gradačca (br. 02-04-683/20 od 18.03.2020. godine), proglašeno je stanje nesreće uzrokovane pojavom koronavirusa (COVID-19) na području Grada Gradačac. Nakon donošenja ove Odluke, Gradski štab civilne zaštite je pristupio donošenju više naredbi i zaključaka vezanih za poduzimanje što efikasnijih mjera prevencije i suzbijanja širenja zaraznih bolesti, te mjera za sprječavanje i ublažavanje posljedica proglašene nesreće izazvane pojavom pandemije uzrokovane koronavirusom (COVID-19).

U vezi sa ostalim okolnostima koje su dovele do potrebe donošenja ove Odluke bitno je istaći kako slijedi. Naredbom Federalnog štaba civilne zaštite, broj 12-40-6-148-12/20 od 17.03.2020. godine, naređuje se privremena obustava pružanja usluga u frizerskim i kozmetičkim salonima i igraonicama na području Federacije Bosne i Hercegovine, a Naredbom broj 12-40-6-148-10/20 od 17.03.2020. godine naređuje se privremena obustava pružanja usluga za kina, muzeje, pozorišta, koncertne dvorane, umjetničke galerije, javne bazene i kupališta, sportske i rekreacijske centre i slično.

Naredbom Federalnog štaba civilne zaštite, broj 12-40-6-148-11/20 od 17.03.2020. godine, naređuje se privremeno obustavljanje pružanja usluga u ugostiteljskim objektima svih kategorija (restorana, pizzerija, slastičarni, ćevabdžinica, čajdžinica, fast food ...) na području Federacije Bosne i Hercegovine, osim usluga proizvodnje i dostave hrane, rad javnih kuhinja kao i proizvodnja i posluživanje hrane za goste hotela uz poštovanje higijenskih i epidemioloških mjera zaštite. Također se naređuje privremeno obustavljanje pružanja usluga u nargila, cafe i bistro barovima, klubovima, diskotekama, kazinima, sportskim kladionicama i slično na području Federacije Bosne i Hercegovine.

Naredbom Federalnog štaba civilne zaštite, broj 12- 40-6-148-26/20, od 19.03.2020. godine naređuje se obustava rada u djelatnosti trgovine na području Federacije Bosne i Hercegovine, osim trgovina prehrambenih proizvoda, prodavnica higijenskih proizvoda, ribarnica, apoteka, specijalizovanih prodavnica medicinskih, veterinarskih proizvoda i opreme, poljoprivrednih apoteka, benzinskih pumpi, kioska, pekara, hemijskih čistionica, specijalizovanih prodavnica za prodaju ortopedskih i drugih pomagala, specijalizovanih prodavnica dječije opreme, prodavnica hrane za životinje, prodavnica građevinskog, vodovodnog i elektro materijala, logističkih i distributivnih centara hrane, pića i higijenskih proizvoda, te veledrogerija. Naredbom broj 12-40-6-148-27/20, od 19.03.2020. godine, naređuje se obustava rada otvorenih pijačnih, tržnih prostora i prostora oko prodajnih objekata osim otvorenog pijačnog i tržnog prostora sa poljoprivredno prehrambenim proizvodima uz osiguranje protoka kupaca i klijenata na način da se omogući potrebna socijalna distanca.

Naredbom Federalnog štaba civilne zaštite, broj 12-40-6-148-36/20, od 21.03.2020. godine naređuje se zabrana kretanja građanima na području Federacije BiH, od 18:00-05:00 sati, a Naredbom broj 12-40-6-148-36-

1/20, od 29.03.2020. godine naređuje se zabrana kretanja građanima na području Federacije BiH, od 20:00-05:00 sati.

Naredbom Federalnog štaba civilne zaštite, broj 12- 40-6-148-40/20 od 22.03.2020. godine naređuje se zabrana kretanja i zadržavanja na otvorenom postoru više od jedne osobe na udaljenosti manjoj od 1,5 m na području Federacije BiH, te taksi vozačima na području Federacije BiH da u automobilima mogu prevoziti samu jednu osobu, s tim da ta osoba sjedi na sjedištu iza vozača uz poštivanje higijensko-epidemioloških mjera.

Naredbom Kantonalnog štaba civilne zaštite Tuzlanskog kantona, broj 02/24-40-006824-10N/20, od 23.03.2020. godine, svim pravnim i fizičkim licima na području Tuzlanskog kantona je naređeno maksimalno radno vrijeme do 16:30 sati.

Iz svih prethodno navedenih akata, odnosno naredbi kao neophodnih mjera sprečavanja i suzbijanja širenja zarazne bolesti, vidljivo je da je istim zabranjeno obavljanje većeg broja postojećih djelatnosti, što će u konačnom rezultirati smanjenjem likvidnosti predmetnih privrednih subjekata. U vezi sa navedenim, kao nesporan zaključak nameće se potreba da se u periodu važenja svih prethodno navedenih naredbi, kao mjera pomoći fizičkim i pravnim licima, kao i drugim pravnim subjektima, u sanaciji ekonomskih posljedica nastalih kao rezultat epidemije koronavirusa, dio poslovnih subjekata, odnosno fizičkih i pravnih osoba kojima je obavljanje registrovanih djelatnosti trenutno zabranjeno, oslobodi obaveze plaćanja naknada obuhvaćenih ovom Odlukom (naknada za zauzimanje javnih površina, naknada za korištenje taksi stajališta, zakupnina za korištenje neizgrađenog građevinskog zemljišta), i to za period počev od stupanja na snagu Naredbe, odnosno od 18.03.2020. godine, do isteka roka od 60 (šezdeset) dana od ukidanja zabrane obavljanja djelatnosti, odnosno kada su u pitanju korisnici taksi stajališta do stupanja na snagu odluke kojom se van snage stavlja Odluka o proglašenju stanja nesreće uzrokovane pojavom koronavirusa (COVID-19) na području Grada Gradačac, broj:02-04-683/20, od 18.03.2020. godine.

Shodno svemu prethodno navedenom, te imajući u vidu opću situaciju uzrokovanu pojavom koronavirusa (COVID-19), u cilju ublažavanja ekonomskih posljedica po poslovne subjekte u Gradu Gradačac, potrebno je da Gradsko vijeće Grada Gradačac, na osnovu člana 8. stav 3. alineja 9. i člana 13. stav 2. alineja 5. Zakona o principima lokalne samouprave ("Službene novine Federacije Bosne i Hercegovine", broj 49/06 i 51/09), člana 184. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03, 22/06 i 43/10), i člana 6. Statutarne odluke o organizaciji Grada Gradačac u skladu sa Zakonom o Gradu Gradačac („Službeni glasnik Grada Gradačac“, broj 1/19 od 11.06.2019.godine), a u vezi sa Odlukom o proglašenju stanja nesreće uzrokovane pojavom koronavirusa (COVID -19) na području Grada Gradačca (br. 02-04-683/20 od 18.03.2020. godine), donese Odluku o utvrđivanju vrste i načina realizacije mjera pomoći fizičkim i pravnim licima u cilju sanacije ekonomskih posljedica epidemije koronavirusa (COVID-19).

OBRADIVAČ:

Služba za urbanizam, investicije i
komunalne poslove